

本
草
述

上海萬有書局印行

【五】

本草述卷之九下

潛江劉若金先生著

武進薛恡秉之氏校訂

隰草部下

●地黃

覈曰地黃一名芑

音虎

名芑

音起

名地髓羅願曰芑以沈下者為珍貴故字從下又

云天玄而地黃天上而地下陽戌而陰巳陽浮而陰沈則地黃地髓芑芑之義與情性為用之方可以想見古取咸陽川澤及渭城彭城同州諸處今唯懷慶者為上諸處隨時興廢不同耳江浙壤地者受南方陽氣質雖光潤而力微不及懷慶山崖者稟北方純陰皮有磊砢而力大也古人種子今唯種根二月生苗初生塌地高者不及尺許葉如山白菜而毛濇又似小芥葉而頗厚中心皺文如撮莖上有細毛梢頭開花如小筒子而色紅紫亦有黃色白色者結實作房如連翹中子甚細而色沙褐根如人指長短粗細不常甚有一枝重數兩者汁液最多雖曝焙極燥項則轉潤二月八月采者未窮物性八月殘葉猶在葉中精氣未盡歸根二月新苗已生根中精氣已滋於葉不如正月九月采者氣全也種植甚易入土即生大宜肥壤根肥多汁法以土壤作壇如浮屠數級寸

段蔣灌根長滋盛也但種植之後其土便苦次年止可種牛膝再二年可種山藥足十年土味轉甜始可復種地黃否則味苦形瘦不堪入藥也

按本經地黃有乾有生蓋采得即用者為生曬乾收者為乾是乾地黃即生地黃之乾者也後人復蒸曬九次然後用之是為熟地黃其生熟不同而涼血補血之異大為懸殊故分註之以便分證投治至諸家本草輒以乾者即為熟幾何不令臨病之工失所據也

生地 氣味甘寒無毒 別錄曰苦 權曰甘平 海藏曰甘苦寒氣薄味厚

沉而降陰也入手足少陰厥陰及手太陽之經 主治傷中逐血痺填骨髓長

肌肉作湯除寒熱積聚除痺療折跌絕筋生者尤良經本又主涼血生血補腎水

真陰不足勞瘦骨蒸日晡寒熱唾血耳鳴涼心火血熱五心潮煩驚悸掌中熱

痛清肺熱咳嗽鼻衄瀉脾胃溼熱吐血牙痛欲脫脾氣痿屢嗜卧足下熱而痛

便血尿血皆治療虛清熱通血脈強筋骨利二便理胎產通經閉別錄云生地補五臟內傷

不足臟屬陰唯此味天一之真陰能補五臟也而亦入手 潔古曰補腎水真

陰不足治少陰心熱在內 原禮曰陰微陽盛相火熾強來乘陰位日漸煎熬

為虛火之證者宜地黃之屬以滋陰退陽 宗奭曰本經只言乾生二種不言

熟者如血虛勞熱產後虛熱老人中虛燥熱者若與生乾當慮大寒故後世改用蒸曝熟者生熟之功殊別不可不詳 復曰本經主治首傷中逐血痺即繼

以填骨髓長肌肉續絕筋等語夫痺者閉而不通隨其血之不通而為病如在

目則赤在齒則痛在肉裏則癰腫在心則昏煩在肺則咳血壅遏而為身熱枯

耗而為燥渴痿軟汎濫而為吐衄崩漏血痺頗廣各以類推逐者俾其流通之

義也性惟潤下功力到時二便通利以為外徵千金方黑膏用治熱積所成之

斑肘後方拌雞蒸汁用治寒積所成之疝咸從血痺之所生耳血中有痺則骨

髓不滿肌肉不長筋脈斷絕均謂傷中若填滿若生長若接續皆克成血液之

流通者也 希雍曰乾地黄稟天一之陰氣兼稟中五之和氣故味甘氣寒而

無毒別錄又云苦者以其兼入心脾也此乃補腎家之要藥益陰血之上品

未分生熟者也

生地黄同大小蘗各半俱搗取自然汁和童便飲治一切血熱妄行

吐血齒鼻衄神效 取汁和麝作飢飢冷淘治蟲心痛 入瓊玉膏為陰陽兩

補之要劑 得青蒿子鼈甲銀柴胡沙參天麥二冬黃檗甘草地骨皮牡丹皮

白芍藥牛膝能治骨蒸勞熱 同人參遠志麥門冬酸棗仁柏子仁茯神甘草

治心虛驚悸怔忡健忘熟亦用 得麥門冬五味子牛膝枸杞子車前子阿膠天

門冬治溺血

用熟亦

同青蒿地骨皮麥門冬白芍藥山茱萸杞葉治婦人月

事先期

同苧麻根搗汁碗許加炒砂仁末三錢治胎動下血

同黃連連翹

薄荷甘草甘菊木通治目暴赤痛

同當歸赤芍藥乳香沒藥肉桂炒黃荊子

末治一切跌打折傷瘀血作痛

愚按地黃之用。在本經即首歸其功於血。蓋稟於天一之真陰。誠如李東垣所云。而更資乎中五之冲氣。故其氣寒者。天一之真陰也。其味甘者。中五之冲氣也。甘而微有苦者。歸於主血之心也。夫血原於水而成於火。乃水火之所以體物而不遺者。土也。故經曰。營出於中焦。夫萬物莫不資生化於土。而唯此味之取精於土者。最專且酷。故種植之地。土便憔悴。十年後方得轉甜焉。得謂此味非專主中焦之營哉。地黃汁液最多。雖極曝晒而旋即轉潤。合於大奪土味。十年乃復者。則真為水土合德。以立地。曰地曰黃。固不誣也。此味至陰。正以療水不濟火之病。在生者其功如是。第氣煉極熟。從陰發陽。陽昌於陰中。而陰乃化。其益陰尤勝於老人更宜也。夫既資冲

氣以化生。而獨以涼血歸之者。謂何。蓋水寒土溼皆為陰。其性就下。故以沉為貴。本經名芩曰地髓。皆此義耳。經曰。至陽盛則地氣不足。必用此味之地氣精專。而未經烹煉者。以對待之矣。觀先哲所云涼血生血。補腎水真陰不足。除諸溼熱者。則其義可明矣。第在經云寒泣血。而此之血痺。更以寒水之真陰療之。

何哉。蓋因於陰虛而陽乃亢。陽亢而陰愈泣。用此益真陰之味。以為責其本之治耳。或曰。此固藉至陰以抑亢陽也。如女子產後血逆。及胎動下血。亦得取責於陽亢乎。曰。當以本經及別錄所云傷中之義明之。夫所謂中。即中氣之謂也。如本經首主治傷中。即云逐血痺。而別錄首主男子五勞七傷。女子傷中。即云胞漏下血。皆以中氣有傷而病於血也。第傷其中氣者。其義云何。蓋下而腎肝有陰中之陽。上而心肺有陽中之陰。陰陽互為其根。然化原却先在陰。乃中土握升降之樞。而行化育。亦本於由陰生陽之元。並暢其由陽歸陰之用。在時賢言氣因上下而有陰氣陽氣之分。可謂精辨矣。夫血乃真陰之化醇也。如本經血痺。為血不得氣以化。別錄胞漏下血。為血不得陰氣以固。是則人身之病於血者。莫不病於血中之陰氣。而病於陰氣者。又寧獨一熱足以傷之乎。故病於陰氣。陰熱而氣不得化。血者。如生地固為宣劑。如本經所謂逐血痺。及逐寒熱積聚是也。若病於陰氣。不因熱而氣不得固。血者。又豈得以生地為補劑。若冠宗奭所謂如血虛勞熱。產後虛熱。老人中虛燥熱。槩與生地當慮大寒是也。蓋甄權所云解諸熱者。即陰虛而相火乘於陰位耳。若然。則宜補陰以靜相火。又不得宣陰而損真元也。唯張潔古去諸溼熱之義。是可參也。蓋陽盛而陰虛者。

則陽不得陰以化。氣之不得化者。則反病於溼而更滋熱。在經曰。陰者藏精而起亟。時賢釋為起氣。是則所云。氣不得血以化。而反病於溼者。不可取證乎哉。雖然。又如日華子云。治吐血鼻衄婦人崩中血暈。又別錄主女子產後血上薄心悶絕等證。又豈得遽然妄投補劑。則用生地而不傷中氣。以為真陰化原之地。投劑者應有斟酌。即甄權曰。此味虛而有熱者宜加用之。乃丹溪又曰。虛而有熱者。慎勿用之。夫二賢之言。何以參差。蓋因虛而得實。甄權之說是也。原其病本在虛。丹溪之說是也。方書治虛勞。有黃芩湯。云主治心勞實熱。小甘露飲治脾勞實熱。地黃湯治腎勞實熱。麥門冬湯治脈實極為病。玄參湯治骨實極為病。石斛湯治精實極為病。夫既病於虛勞。而云實者。謂何。蓋經曰。精氣奪則虛。邪氣盛則實。因精氣之虛。以致邪氣之實。因邪氣之實。而益致精氣之虛。故用生地。先瀉其實在邪者。救其虛在精者。如補勞劣之味。乃在其後。何先哲製方。甚中肯綮。而有節次。乃如斯也。是以虛勞方中。有生地同熟地用者。唯如前數方之證言實者。則止用生地。而熟地不得與之同。可以明於一宣一補。頓以生熟異其用。此際微義。臨病之工。不可以細察。而俾其得當乎哉。附方 嗽唾血勞瘦骨蒸。日晚寒熱。生地黃汁三合。煮白粥。臨熟入地黃汁攪勻。空心

食之 吐血不止生地黃一升二合白膠香二兩以磁器盛入甑蒸令膠消服之 肺損吐血或舌上有孔出血生地黃八兩取汁童便五合同煎熱入鹿角膠炒研一兩分三服 鼻出衄血乾地黃地龍薄荷等分為末冷水調下 吐血便血生地汁六合銅器煎沸入牛皮膠一兩待化入薑汁半盃分三服便止或微轉一行不妨 小便血淋生地黃汁車前葉汁各三合和煎服 妊娠胎動生地黃搗汁煎服入雞子白一枚攪服 產後中風脇不得轉交加散用生地黃五兩研汁生薑五兩取汁交互相浸一夕次日各炒黃浸汁乾乃焙為末每酒服一方寸七 溫毒發斑黑膏治溫毒發斑嘔逆生地黃二兩六錢二字半好豆豉一兩六錢二字半以豬膏十兩合之露一夜煎減三分之一絞去滓入雄黃麝香如豆大攪勻分作三服毒從虛中出則愈忌蕪荑 疔腫乳癰地黃搗敷之熱即易性涼消腫無不效 牙疳宣露膿血口氣生地黃一斤鹽二合末自搗和團以麪包煨令烟斷去麪入麝一分研勻日夜貼之 希雍曰生地黃性大寒凡產後惡食作瀉雖見發熱惡露作痛不可用誤用則瀉不止胃氣者後天元氣之本也胃困則飲食不運精血不生虛熱何自而退故并當歸忌之凡見此證宜多加炮薑桂心人參必自愈凡陰虛咳嗽內熱骨

蒸或吐血等候一見脾胃薄弱大便不實或天明腎泄產後泄瀉產後不食俱禁用生地黃當歸誤則同於前轍慎之

修治 生采者大寒日乾者微寒火乾者微溫脈洪實熱者生采搗汁服之脈虛血熱者用薑汁拌炒免致泥膈如上達補頭腦虛或外行潤皮膚燥必資酒浸 生地搗成節酒洗將木棍搥匾極薄曬乾隔紙焙用 王龜齡集曰生地長而直者能生血用乳汁浸一宿曬乾為末 生熟俱忌犯鐵地髓煎生地黃十斤洗淨搗壓取汁鹿角膠一斤生薑半斤絞取汁蜜二升酒四升文武火煮地黃汁數沸即以酒研紫蘇子四兩取汁入煎一二十沸下膠膠化下薑汁蜜再煎候稠瓦器盛之每空心酒化一匕服大益

熟地黃 按陳藏器曰乾地黃本經不言生乾及蒸乾方家所用二物各別蒸乾即溫補生乾即平宣當依此法用。即是以盡其用之法。雖分生熟而所入之經一也。然已移其性味。俾一宣一補之頓殊。豈得謂一經火製。便謂熟地黃乎。是必烹煉至久。透出陰中之陽。乃得收功於補腎氣也。如李東璧氏製法。庶幾近之。錄入修治條於左。

氣味甘微苦微溫無毒

經本

潔古曰甘微苦寒假酒力酒蒸則微溫而大補味

厚氣薄陰中之陽沉也入手足少陰厥陰經 又曰得牡丹皮當歸和血生血
涼血滋陰補髓 主治填骨髓長肌肉生精血補五臟內傷不足通血脈利耳
目黑鬚髮男子五勞七傷女子傷中胞漏經候不調胎產百病時補血氣滋腎
水益真陰去臍腹急痛病後脛股酸痛元坐而欲起目眩瞋無所見好 潔古
曰地黄生則大寒而涼血血熱者須用之熱則微溫而補腎血衰者須用之又
臍下痛屬腎經非熟地黄不能除乃通腎之藥也 東垣曰生地黃能益腎水
涼心血其脈洪實者宜之若脈虛者則宜熟地黃假火力蒸九數故能補腎中
元氣仲景六味丸以之為諸藥之首天一所生之源也湯液四物湯治藏血之
臟以之為君者癸之同歸一治也 宗奭曰如血虛勞熱產後虛熱老人中虛
燥熱者若與生乾當慮大寒故後世改用熟者 龜齡集曰熟地黃用粗而直
者能生精 機要曰熟地當歸合用名補髓煎 王碩云生地黃能生精血天
門冬引入所生之處熟地黃能補精血用麥門冬引入所補之處 希雍曰熟
地黃同沙苑蒺藜肉苁蓉鹿茸山茱萸五味子能益男子精 同人參枸杞五
味子麥門冬鹿茸車前子覆盆子兔絲子多服令人有子 同黃耆黃連黃蘗
酸棗仁五味子白芍藥麥門冬龍眼肉牡蠣粉治盜汗久不止 同砂仁治胎

動下血腰痛 同當歸川芎蒲黃黑豆炒炮薑澤蘭益母牛膝續斷杜仲鹿角膠治一切產後血虛發熱 同甘菊女貞實枸杞子白蒺藜能明目益精 同何首烏桑椹甘菊鱧腸蜀椒能烏鬚髮

愚按地黃本天一寒水之精。陰中原含有陽。然不假烹煉。功深則無以發陰中之陽。而令其上通天氣。唯火候足而天氣通。真陰乃得隨陽以上。而盡其普益臟腑之功。先哲謂熟地黃能補腎中元氣。旨哉其言之也。是從陰發陽。從陽達陰。誠為補腎之第一品。內經曰。通天者生之本。然非本於天一所生之源。又烏能如坤元資生而宏其利益哉。抑本經於乾地黃下。其主治謂逐血痺。即繼以填骨髓。長肌肉。療絕筋等語。此固不化則不生之微義。盧氏亦有發明矣。第如血痺阻其化機。實藉生者平宣。若功歸實際。定以補益責之熟者耳。時珍以填骨髓等功移於熟地下。其亦有所見也夫。

希雍曰。凡胸膈多痰氣道不利。升降窒塞。藥宜通而不宜滯。湯液中禁入地黃。愚按古方多以生地黃熟地黃並用。為其兼補心腎也。但生地未經製者性寒。而熟地又多泥膈。若以砂仁製成熟者。則引之徑下。然同於生者用之。猶未免於滯也。愚意涼血補血似不可同用。熟者入丸。生者入煎劑。各兼和氣行氣之劑。則不滯也。

修治 揀取沉水肥大者以好酒入縮砂仁末在內拌勻柳木甑於瓦鍋內蒸令氣透眼浪音乾再以砂仁酒拌蒸眼如此九蒸九眼乃止蓋地黃性泥得砂仁之香而竄合和五臟沖和之氣歸宿丹田故也今市中惟以酒煮熟售者不可用 中梓曰地黃九蒸九曬方熟每見世人一煮透便以為熟地悞矣稟北純陰之性而生非太陽與烈火交煉則不熟也所以固本膏雖經曰煎熬必生熟各半用之即此可以知地黃非一煮便熟者矣 附方 月經不調久而無子乃衝任伏熱也熟地黃半斤當歸二兩黃連一兩並酒浸一夜焙研為末煉蜜丸梧子大每服七十九米飲溫酒任下 每見治經不調者或純用寒劑或多用補氣夫若寒過劑固致亡陰即補氣而祇用參芪則所治又失血中陰氣之義此方衝任伏熱一語大為中肯而處方亦簡而切當也 產後血痛有塊并經脈行後腹痛不調黑神散用熟地黃一斤陳生薑半斤同炒乾為末每服二錢溫酒調下 按熟地烹製如法乃補真陰之虛者屬第一味方書於諸證用之殊為不少以真陰即生身之元而滋味固要藥也不及備錄聊附二方於此總論益陰 愚按陰固貴於益而益陰之中亦即有動靜衡勝之微如丹溪之治陰虛發熱者於四物湯亦分陰陽血之痛者為陽芎歸主之血之靜者為陰

生地黃芍藥主之。若血之陰不足。雖芍歸辛溫亦在所不用。若血之陽不足。雖薑桂辛熱而亦用之。固唯變所適也。又海藏云。如用血藥。當於四物湯中擇其一二可也。可謂不謀而合者矣。故如行血則用芍歸。以行春夏之令。如欲止血則用地芍。以行秋冬之令。此又升沉之道也。

牛膝

弘景曰其莖有節似牛膝故以為名。方書所謂暴節者是。

別錄曰牛膝生河內川谷及臨朐。二月八月十月采根陰乾。頌曰今江淮閩

粵關中亦有之。然不及懷慶者為真。以根極大長至三尺而柔潤者為佳。時

珍曰牛膝處處有之。謂之土牛膝。不堪服食。惟北土及川中人家栽蒔者為良。

秋間收子至春種之。其苗方莖暴節葉皆對生。頗似莧葉而長且尖。銛音峭角銳上也

秋月開花作穗結子狀如小鼠負蟲。有濇毛皆貼莖倒生。九月末取根。根柔潤

而細。一直下生長者約三五尺。莖葉亦可單用。中梓曰土牛膝所稟薄故短

而細。主破血氣。川牛膝所稟厚故肥而長。主補精髓。

根氣味苦酸平無毒。普曰神農甘雷公酸無毒。李當之溫。主治通經脈逐

血氣療寒溼痿痺大筋拘攣膝痛不可屈伸及腰脊痛並五淋尿血莖中痛女

子月水不通逐惡血產後腹痛血暈又主癰腫惡瘡傷折更治陰分久瘧理膀

脫氣化邊難小便秘療傷中少氣男子陰消老人失溺腰膝軟怯冷弱益腎强

筋利陰氣補精氣

好古曰强筋補肝臟風虛時珍本草綱目載有喉痺下痢之治似皆宜於土牛膝其方見後

丹溪曰

牛膝引諸藥下行宜入足少陰經以理諸疾婦人得之應歸血海故行血有功

又曰筋骨痛風在下者宜加用之凡用土牛膝春夏用葉秋冬用根惟葉汁效

尤速 時珍曰牛膝乃足厥陰少陰之藥所主之病大抵得酒則能補肝腎生

用則能去惡血二者而已其治腰膝骨痛足痿陰消失溺久瘧傷中少氣諸病

非取其補肝腎之功歟其癥瘕心腹諸痛癰腫惡瘡金瘡折傷喉齒淋痛尿血

經候胎產諸病非取其去惡血之功歟 類明曰寒溼痿痺多在身半已下牛

膝苦酸涌泄為下行之劑 嵩曰陰虛血少不能榮筋腰腿痛痠軟之疾斷不

可缺 楊士瀛直指方云小便淋痛或尿血或沙石脹痛用川牛膝一兩水二

盞煎一盞溫服一婦患此十年服之得效土牛膝亦可或入麝香乳香尤良

復曰牛膝徑直下行能逐血中之氣原血榮脈中氣衛脈外各有道路而不得

相溷若血中有氣如寒則能疼熱則能腫在子宮則能孕能瘕在膀胱則淋在

喉則痺在腸則痢在募原按暑則瘧在腸胃外則癥結在皮膚內則癰疹瘡癰

之類取當下行者用之百倍其功 按盧復說大有意義但所言血中有氣以
為諸病然則血中無氣耶措辭未免有戾愚為達其理於總論中 繆希雍曰
牛膝稟地中陽氣以生氣則兼乎木火之化也故其味苦酸平無毒味厚氣薄
走而能補性善下行故入肝腎 君木仙茅木瓜石斛茯苓石南葉五加皮萆
薢生地黃黃耆芍藥虎骨沉香桂治諸痺 同甘菊花石斛木瓜何首烏生地
黃虎骨沉香人參木黃耆天門冬麥門冬杜仲續斷芍藥橘皮黃芩桑寄生
白蘚皮治一切痿痺四肢拘攣筋骨疼痛 君當歸地黃能下死胎加朴消立
下胞衣 君木瓜石斛萆薢生地黃黃芩五加皮骨碎補續斷金銀花白及芍
藥甘草甘菊根紫花地丁茜草連翹治鶴膝風 根苗同用二三兩濃煎調蠶
甲末三錢空心服治瘡在陰分久不瘥者三劑必已胃虛者加人參兩許橘皮
去白五錢 君青蒿生地黃麥門冬甘枸杞子熬膏治婦人血虛發熱內熱口
乾舌苦 治小便不利莖中痛欲死兼治婦人血結腹堅痛鮮牛膝三四兩並
葉土者亦可白酒煎濃服之即愈 金瘡作痛生搗傅之立瘥

愚按牛膝在本經謂其逐血氣而別錄更謂其療傷中少氣續絕益精利陰氣
填骨髓者豈其相戾歟如以為能逐血氣即其療傷益陰之功彼諸藥之宣血

導氣者多矣。何以裨益無聞也。蓋其味苦。苦就下。人身半以下為地之陰。其入於至陰之腎無疑。其苦後有酸。其氣且溫。是又入於陰中少陽之肝也。然種其子於春時。歷夏而秋。乃開花作穗結實。故秋間收子。九月之杪。采根而用。是秉乎木之氣。而更宣暢於火。告成於金。以致其順下之用。順下者水也。觀其根一直下生。長者約三五尺。不可想見哉。夫人身陰氣本隨陽之升以達於上。然陽之奉上者。又隨陰降而達於下。設上之陽微而不能降。則陽亢而不得周於下。即上之陽虛者亦然。將腎肝之真陰亦虧。而血乃泣。患乃生。唯此本木火之宣成於金之降以歸水。而致其順下之用。牛膝告成於秋。若其味有辛。便是。駐其氣於金。不成其順下之性矣。蓋非苦無以至地。非辛無以升天。在諸藥之味固然。惟不帶辛味。故直是藉金之全力。以達木火之氣於水中耳。緣金水固相生者也。是其順下為功。

原不離乎木火之化。希雍所謂秉地中陽氣以生。而氣則兼乎木火之化者。即本經首言治寒溼為病。知其義不妄也。然在本經曰逐血氣。在盧復曰逐血中之氣。此義亦可參。夫營行脈中。衛行脈外。脈之內外。總是一氣。惟在脈中者精專曰營。在脈外者浮氣曰衛。浮氣固不能入脈。然衛氣充周。和調五臟。灑陳六腑。乃入於脈。是入脈者。即其氣之精專者也。然則脈中之營。不統於脈外之衛乎。故血中之氣病。乃衛弱而營虛。不能祛邪。而氣著以為病耳。夫人身陰氣本

金水以奉木火於上陽氣本木火以達金水於下。而此味乃合於下達妙理。故非破血。乃化血。亦非就血而化。乃就血中之氣而化。於下體痿痺。拘攣。腰痛。膝痛。又如五淋尿血莖中痛。女子月水不通。此皆其的對。如癥瘕血結惡血血暈。固亦由治腎肝之陰氣以及之。蓋血乃真陰之化醇也。曰。所謂療傷益陰。即在是乎。詎知陰陽合同而生化者也。不生烏乎化。不化又何以生。此陰之能化。即能生。陰之能生化。即為陽生化之地。有何傷中陰衰之不奏功乎。但不得以破血散氣之劑例視。致疑於主治之相戾也。抑足三陰從足走腹。而此之逐血氣以順下者。其義謂何。曰。足三陽從頭走足。又即三陰生化之原。如經所謂寒溼痿痺等證。亦由於足三陽之氣不降。而此味秉木火之化。成於金水以順下。正合三陽下行之義。所謂逐血中之氣。蓋本此也。夫三陽之不下行者。亦本於水穀之氣不能並宗氣以下。而衛氣先虧耳。不調衛氣以為營氣之先。止導營中之氣。而言其順下有力。謂能通十二經脈也。可乎哉。

附方 喉痺乳蛾新
鮮牛膝根一握艾葉七片搗和人乳取汁灌入鼻內須臾痰涎從口鼻出即愈
無艾亦可 痢下腸蠱凡痢下應先白後赤若先赤後白為腸蠱牛膝二兩搗
碎以酒一升漬經一宿每服一兩盃日三服 婦人血塊土牛膝根洗切焙搗